



N°1379
Entrée le 17.10.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 17.10.2024
Chambre des Députés

Ministère de l'Agriculture, de l'Alimentation et de la Viticulture	8
Référence : 668/2024	
17 OCT. 2024	
A traiter par :	
Copie à :	

Monsieur Claude Wiseler
Präsident vun der Chamber

Lëtzebuerg, den 16. Oktober 2024

Här Präsident,

Esou ewéi den Artikel 80 vum Chambersreglement et virgesäit, bieden ech Iech, dës parlamentaresch Fro un d'Ministesche fir Landwirtschaft, Ernährung a Wäibau weiderzeleeden.

An engem rezente Presseartikel ass vun engem Déiereschutzfall bericht ginn, wou 401 Mierschwéngercher saiséiert goufen, well se net ënner aartgerechte Bedingunge gehale goufen. Säit der éischter Kontroll den 30. September hu missten iwwer 100 Déiere wéinst diverse Grënn (Verfettung vun den Organer oder Deformatiounen vun Zänn), ageschléifert ginn. Vun verschiddenen Déiereschutzorganisatiounen gouf kritiséiert, datt dës Affaire net transparent gehandhaabt gouf a keng gutt Kommunikatioun stattfonnt huet. En plus gouf vun deenen Déiereschutzorganisatiounen kritiséiert, datt ee sech hätt kenne méi Zäit loosse fir d'Ënnersichung vun den Déieren a soumat net hätt missten sou schnell esou vill Déieren euthanaséieren.

An dësem Zesummenhang wéilt ech der Madame Minister folgend Froe stellen:

1. Gouf et, ewéi et am Presseartikel ervir geet, keen offiziell Schreiwes vun der ALVA? Wa net, wisou? Wéini gëtt ALVA en offiziell Schreiwes eraus?
2. Firwat huet d'ALVA an esou engem Fall ewéi dësen, wou ganz vill Déiere saiséiert goufen, just eng Déiereschutzorganisatioun kontaktéiert?
3. Wéi eng Déiereschutzorganisatiounen si wéi oft am Joer 2022 an 2023 vun der ALVA em Hëllef gefrot gi fir Déieren opzehuelen?

Mat déiwem Respekt,

Claire Delcourt
Deputéiert



Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°1379 vun der éierbarer Deputéiert Claire Delcourt

- 1. Gouf et, ewéi et am Presseartikel ervir geet, keen offizielt Schreiwes vun der ALVA? Wa net, wisou? Wéini gëtt d'ALVA en offiziell Schreiwes eraus?**

An dëser Affär gouf et keent offizielt Schreiwes vun der ALVA. Generell ass et esou, dass d'ALVA iwwert hir Aarbecht um Terrain betreffend d'Déierewuel, wou et sech em eent héichsensibelt Thema, och fir all implizéiert Acteuren, handelt, net no bausse kommunizéiert. D'ALVA wäert awer hir Kommunikatioun an dësem Beräich iwwerdenken, fir an Zukunft jee no Fall méi proaktiv ze kommunizéieren.

- 2. Firwat huet d'ALVA an esou engem Fall ewéi dësem, wou ganz vill Déiere saiséiert goufen, just eng Déiereschutzorganisatioun kontaktéiert?**

An dësem Fall war d'Unzuel vun den Déieren op der Plaz am Virfeld schwéier anzuschätzen, eréischt wéi d'Déieren erausgeholl ginn sinn, konnten se all eenzel gezielt ginn. D'ALVA kontaktéiert am Allgemengen eng Organisatioun, déi, wann se sech bereet erkläert bei enger Aktioun ze hëllefen, d'Déieren an hir Obhut hëllt a sech gegebenefalls jee no Bedarf och mat weideren Acteure fir d'Versuerge vun den Déieren a Verbindung setzt. An dësem Fall ass d'Organisatioun nach op der Plaz, wéi d'Ausmooss vun der Unzuel vun den Déieren ze gesi war, gefrot ginn, ob fir si d'Gerance machbar wier.

- 3. Wéi eng Déiereschutzorganisatiounen si wéi oft am Joer 2022 an 2023 vun der ALVA em Hëllef gefrot gi fir Déieren opzehuelen?**

Et gëtt keng Statistik doriwwer, wéi oft déi eng oder aner Organisatioun gefrot ginn ass. Wéi eng Organisatioun kontaktéiert gëtt, hänkt haaptsächlech vun der Déierenart of an dono, ob d'Organisatioun bei der Kontaktobnam Kapazitéit(en) huet oder net. Et kennt och vir, datt Kontakt mat enger Organisatioun opgeholl gëtt, déi dann un eng aner verweist oder selwer eng aner kontaktéiert, well se dee Moment keng Plaze fräi hutt.

Lëtzebuerg, den 24. Oktober 2024

(s.) Martine HANSEN

Ministesch fir Landwirtschaft, Ernährung a Wäibau